

Pesta menggarau di Sungai Berang

Oleh Zulhilmi Hat
zulhilmi_hat@bh.com.my



AKTIVITI menggarau ikan di Sungai Berang. - Foto Asyraf Hamzah

KAEDAH menangkap ikan secara tradisional berkemungkinan tidak dilupakan golongan generasi muda jika mereka masih meminati seni tangkapan ikan tinggalan warisan nenek moyang kita.

Sebagai contoh, kaedah menggarau ikan itu masih digunakan sebilangan penduduk Kampung Lenjang, Kuala Berang ketika waktu senggang atau tatkala air Sungai Berang mulai surut.

Pada ketika itulah, keluarga terdekat terdiri daripada kaum wanita dan kanak-kanak atau penduduk sekampung berpusu-pusu ke tebing Sungai Berang untuk mengambil ikan seperti sebarau, lampam, kelah dan baung yang terperangkap di dalam jaring.

Tatkala lelaki gigih menghalau ikan dari hulu hingga ke hilir sungai, wanita pula sibuk menyediakan makanan dan minuman untuk dijamu kepada hadirin pesta menggarau yang dilakukan saban tahun ini.



AKTIVITI menggarau ikan di Sungai Berang. - Foto Asyraf Hamzah

Menggarau ikan ialah aktiviti menghalang dan menghambat ikan dari hulu sungai dengan menggunakan kayu, pelepah kelapa, buluh dan menjerit-jerit untuk menakutkan serta memaksa ikan masuk ke pukot yang direntang di dalam sungai.

Kebiasaannya aktiviti itu memerlukan tenaga melebihi 15 hingga 20 orang yang akan memainkan peranan sebagai penghambat dan pemegang pukot yang direntang.

Selain pukot sebagai alat utama memerangkap ikan, buluh bersaiz kira-kira dua meter dipacak di tengah sungai bagi menakutkan ikan atau memaksanya melarikan diri ke lorong khas yang dibuat di penjuru pukot di tepi sungai.

Suatu masa dulu, menggarau atau ngambat ikan yang popular di negeri pantai timur dilakukan secara berkumpulan, terdiri daripada keluarga atau jiran sekampung bagi tujuan mencari lauk-pauk untuk majlis keramaian, kesyukuran dan sebagainya.

Ketika ini, aktiviti lebih berkonsepkan kekeluargaan dilakukan sekadar suka-suka atau untuk tujuan promosi produk pelancongan negeri.



AKTIVITI menggarau ikan di Sungai Berang. - Foto Asyraf Hamzah

Penggiat menggarau, Hussin Ismail, 60, berkata keseronokan menggarau adalah apabila ahli keluarga berkumpul di tepian sungai untuk menangkap ikan yang terperangkap di pukat.

"Aktiviti ini meriah, tambah pula kalau ikan besar yang terperangkap. Semua berebut untuk menangkap ikan terbabit.

"Selepas penat menangkap ikan, makan pula beramai-ramai bersama keluarga di tepi sungai, memang menyeronokkan," katanya ketika ditemui pada aktiviti menggarau yang diadakan sempena Program Sahabat Media Tahun Melawat Malaysia (TMM) 2014,

Hussin berkata, sebanyak empat hingga lima kilogram ikan seperti sebarau, lampam, tengas, diperoleh setiap kali beliau dan keluarganya menggarau ikan.

Tambahnya, hasil tangkapan ini bukanlah untuk dijual tetapi untuk dimasak dan dimakan oleh keluarga terdekat yang pulang ke kampung.



AKTIVITI menggarau ikan di Sungai Berang. - Foto Asyraf Hamzah

INFO

Menggarau ikan

- * Sesuai digunakan di sungai berair cetek dan berarus sederhana laju
- * Kaedah memukul air bertujuan menakutkan ikan
- * Pukat direntang di sungai untuk memaksa ikan memasuki ruang pukat berbentuk 'V'
- * Dilakukan pada musim kemarau

SUMBER: Berita Harian Ahad, 22 March 2015